



*Sabtu 10 April 2021*  
**Ogen: Jeremia 51:50-53**



**Pulah I bas Komaten Nari**



Lit dua pengertin kematen si ituriken i bas renungenta enda. Pemena, mate secara fisik eme daging kula, lanai erkesah, lanai lit denyut jantungna, kaku lanai banci bergerak. Sipeduaken, mate secara pertendin, ndauh sirang ras Dibata, lanai ndalanken sura-sura Dibata, lanai megi sora Dibata. Ikataken Tuhan man bangsa Israel, 'kam enggo pulah i bas kemaren nari, ngatakensa pulah i bas kematen fisik ras kematen pertendin.

Engkai maka bage nina Tuhan? Sebab Tuhan nerapken bangsa Israel tupung iruntuhkenna negri Babilon, isuruhna lawes bangsa e, gelah ula ikut kena runtuh-runtuhen Negara Babilon. Galumbang lawit si ergeruhguh erbahansa lanai lit kalak si la mate, atan ras kerina si tading ije ceda, runtuh rata ras taneh. Tapi kalak Israel selamat i je nari. Secara kula bangsa e la ikut mate. Emaka ipersingeti Tuhan ka bangsana nina, aminna pe kam ndauh i bas Aku nari, ingetlah Aku Tuhannu, ingetlah Jerusalem. Kata e nurikensa maka bangsa Israel ndube enggo sirang ras Dibata, itadingkenna Dibata bengket ia ndahi dibata-dibata si deban, ipindona gegeh man bangsa sideban lako naluken musuh-musuhna. Adi ipindo gegeh ras penampat man bangsa si deban, arus ka ikut nembah dibata-dibatana. Bagem Israel nundalken Dibata, la setia ras meraguken kuasa Dibata. Tupung paksa bage ikataken bangsa e mate secara pertendin. I bas kesabaren ras kesetian Dibata, ialo-aloNa denga bangsa e, ipekenana ras iberekenNa kegeluhen. IberekenNa pengarapen maka Israel banci denga mulih man baNa. Tupung ikatakenNa inget Aku, Tuhannu ngatakensa Dibata nge simada Israel, si ngaturken kegeluhenna, si ngasup njamini kegeluhenna. Inget Jerusalem, kuta kemulihenndu, i je nge situhuna kam nggejapken kiniersadan saphi-saphi kam, ije idatkenndu keamananen si tuhu-tuhu, kuta simereken kemalemen ate, dame seh ku pusuh. Sirang ras Dibata, situhuna erbahan Israel medungu, kalak asing engkuasai ia, ras ibahan ia jadi uru-urun kalak sienterem. Tapi bas keleng ate Dibata, ibahanna ia mulihkan jadi kalak si medolat, alu naruhken ia mulihkan ku Jerusalem. Pulah i bas kematen nari, labo ban beluhta tapi perbahan kesetian Dibata.